

元遺山先生全集

附

凌輯年譜

遺山先生金亡不仕幾三十年其舊都之感故君之思幽
憂慷慨之端悱惻纏綿之故不可明言者悉寓之於詩顧
其詩集分體而不編年其出處又皆散見於他書閱之者
但獵取其辭華剽襲其體格而已究未能得其寄託之所
在也乾隆辛丑客居揚州讀先生之詩而愛之展卷之際
身世漠不相關古今渺不相接然而其情之可以移人者
常一往而不可窮其誠之可以動物者每三復而不能置
茫茫然而來怲怲焉欲動不自知其何心也旣而取金史
先生本傳及文集排比而類次之尋先生所遭之時與先
生所處之境而後先生之出處本末有所考庶幾先生之

詩之命意有所窺蓋其天懷所感激偶於一物焉而伸之
其孤憤所鬱結偶於一事焉而發之身處於元而心在乎
金言盡於此而意繫乎彼細而按之隨處皆舊都之感故
君之思也始知向之相賞於辭華體格閒者爲已淺矣然
先生出處本末天興甲午以前雖具金史本傳而自乙未
以至丁巳往來乎齊魯燕趙晉魏之間行蹤靡定本傳及
郝陵川所撰墓銘皆未之詳蒐緝亦殊不易易也於是放
魯氏之於少陵施氏之於東坡之例以年爲經以詩緯之
爲先生年譜一書癸卯在京師曾以草創質翁覃溪師師
甚喜曰昔者亦擬爲此今得子書余可以不作矣子其勉

旃嗣以牽於俗累稿凡數易終未成書及就官甯國稍稍得暇乃取舊稿并雜采金史元史中州集歸潛志元文類洎金元人文集撰著之等鉤稽校勘釐爲二卷以仕金時事爲上卷北渡後事爲下卷其可考者錄之其不可考者闕之後人議論之誣考證之疏者則爲辨之至於其詩之寄託之所在未敢臆解聊自附於季卿元之之後惜道遠不獲就正於吾師也嘉慶元年歲在丙辰十一月朔欽凌廷堪序

我

不難意五姓書讀出嘉慶元年歲在丙辰十一月間煇
嘗到之也五未敢加稱自謂此率陳元之之辭謝改
謂之爲人編簡之詞書讀之海濤以爲難之至其其精之
事爲上等其對對事爲不卷其可法香粒之其不可等香
即金示人文幾對善之等隨解妙佛靈爲一卷以并金和
得別代更書辭并探采金與元與中與與體轉志元文朕
編以家或系果其其幾幾幾未與書又與官官國國解

元遺山先生年譜卷上

讀書山房刻本

歛凌廷堪次仲編

平定張穆碩洲訂

金章宗明昌元年庚戌先生生

生七月出繼叔父格

先生南冠錄引予以始生之七月出繼叔氏隴城府君迨大安庚午府君卒官扶護還鄉里時予年二十有一矣

郝經先生墓銘先生諱好問字裕之太原秀容人系出拓跋魏故姓元氏曾大父春忠顯校尉隰州團練使大父滋善儒林郎銅山府君贈朝列大夫父格顯

武將軍鳳翔府路第九處正將兼行隴城縣令騎都

尉河南縣開國男食邑三百戶妣河南縣君張氏

穆案

先生本生妣河南郡太君王氏見為第四女配壻祭家廟文續夷堅志云外祖柔服簿王君大定中卒官又一條云鄜州洛交有妖人白神官外祖王君時為此縣主簿

金史本傳元德明太原秀容人棄舉不第放浪山水

閒有東巖集三卷子好問最知名

廷堪案先生以始生七月出繼叔氏中州集所謂

先大夫字德明號東巖者先生本生父也郝經陵

川集遺山先生墓銘所謂父格顯武將軍兼行隴

城令者即叔氏隴城府君也故先生集中為第四

女配壻祭家廟文稱德明爲顯伯考贈中順大夫
東巖府君稱格爲顯考廣威隴城府君金史本傳
據中州集謂德明爲先生父但失載出繼一事耳
至金詩紀事則云案中州集載楊叔玉墓銘云先
生姓元氏字德明好問不敢名父故云爾金史傳
中不爲詳著漫從中州集所載亦以字書失實甚
矣山西舊志中每有金人元格詩始知德明名格
也竟以格與德明合爲一人較金史尤誤夫格爲
隴城令德明隱居繫舟山不仕出處判然何不考
之甚耶郭元釭全金詩亦以德明爲卽元格今悉

正之

又案覃溪師曰集中自注云余家自五代以後自汝州遷平定宋末又自平定遷於忻故文字中以平定爲鄉郡此云宋末謂靖康末也 又案嘉慶

五年十一月翁覃溪師自都門寄示新刻所著元遺山先生年譜一卷於是取廷堪稿中所未備者

補錄焉另標覃溪師曰以別之不敢昧所自也間

有異同之處亦不復追改懼失其真也

穆案凌氏補錄諸條

皆以小字寫於書眉余既并刻翁譜則補錄諸條可不複出故全刪之而存其首條以見例

二年辛亥二歲

三年壬子三歲

四年癸丑四歲

始讀書

先生南冠錄引予自四歲讀書八歲學作詩今四十年矣

五年甲寅五歲

從父格官掖縣

廷堪案先生濟南行記云予兒時從先隴城府君官掖縣嘗過濟南又濟南雜詩云兒時曾過濟南城暗算存亡只自驚四十二年彈指過只疑行處

是前生先生再遊濟南在乙未七月則知格官掖
縣時先生方五歲也

六年乙卯六歲

承安元年丙辰七歲

能詩

郝經先生墓銘先生七歲能詩太原王湯臣稱爲神
童

二年丁巳八歲

學作詩

先生南冠錄引八歲學作詩

廷堪案墓銘作七歲能詩與此異南冠錄引爲先生自敘必不誤

三年戊午九歲

四年己未十歲

五年庚申十一歲

從父格官冀州

郝經先生墓銘年十一從其叔父官於冀州學士路
宣叔賞其俊爽教之爲文

泰和元年辛酉十二歲

三年壬戌十三歲

三年癸亥十四歲

從父格官陵川受業於郝天挺之門

穆案先生嘗與田紫芝同從曾大雨

游見續夷堅志○案續夷堅志田德秀夙悟條曾當作層音非人姓大雨指紫芝寄詩事非人名張氏案語誤

郝經先生墓銘年十有四其叔父爲陵川令從先大父學

金史隱逸傳郝天挺字晉卿澤州陵川人太原元好問嘗從學進士業貞祐中居河南耿耿自信甯困窮終不一至豪富之門年五十終於舞陽

元史郝經傳經字伯常其先潞州人徙澤之陵川祖天挺元裕嘗從之學金亡經往來燕趙聞元裕每語

之曰子貌類汝祖才器非常勉之世祖元年以翰林
侍讀學士使宋館真州伯顏南伐宋懼以禮送歸明
年卒謚文忠

廷堪案元史所稱元裕卽先生也初疑先生字裕
之修史者採諸舊書成於倉卒誤脫之字故趙復
等傳又有元好問竟若兩人後考張德輝等傳元

裕之稱屢見豈先生北渡後或改名爲裕歟未可

盡以爲史誤也

穆案四元玉錄莫若序稱鋒人元裕有細艸羅士琳謂卽先生是也

至疑鋒人爲絳人之訛則誤然亦不能定其當作何字

又案元史又有一郝天挺字繼先出於朵魯別族

受業於遺山元好問累拜河南行省平章政事諡
文定嘗修雲南實錄五卷又注唐人鼓吹集十卷
行於世此天挺非晉卿也時先後有二郝天挺一
爲先生之師一爲先生之弟王文簡池北偶談辨
之甚詳

四年甲子十五歲

學爲時文

先生古意詩七歲入小學十五學時文

五年乙丑十六歲

本生父德明卒

先生中州集先人捐館後十年好問避兵南渡游道
日廣世始知有元東巖詩

廷堪案宣宗貞祐二年五月遷都南京是年爲甲
戌先生避兵南渡河年二十有五則前十年先生
十六歲

六年丙寅十七歲
七年丁卯十八歲

父格始教之民政

先生南冠錄引十八先府君教之民政從仕十年出
死以爲民

天慶觀記予嬰年先大夫挈之四方十八乃一歸

八年戊辰十九歲

衛紹王大安元年己巳二十歲

長女真生

郝經先生墓銘女五人長曰真適進士東勝程思温
廷堪案先生示程孫詩云生女四十年今有爲父
樂又云明年吾六十家事斷關白則知真生先生
方二十也

又案先生子三人長撫次振次摠女五人生年可
考者惟真及三女順長子撫而已

二年庚午二十一歲

父格卒官隴城先生扶護還秀容

先生南冠錄引大安庚午府君卒官扶護還鄉里時
年二十有一矣

業續夷堅志好問年二十一先君官隴城大安庚午春
宣宗先人疽發於鬢好問愚幼平居作舉子計於醫藥惜
然無所知庸醫滿前任其施設先君竟用是捐館

三年辛未二十二歲

崇慶元年壬申二十三歲

廷堪案先生兩山行記予年二十許時自燕都試

與客登南樓者當在此一二年間

至甯元年癸酉二十四歲

三平年 延堪案是年八月癸巳紇石烈執中弒衛王九月

甲辰宣宗卽位壬子改元貞祐

宣宗貞祐二年甲戌二十五歲

蒙古兵陷忻州屠城先生兄好古遇害先生避兵南渡

河

先生敏之兄墓銘兄字敏之諱好古歿於貞祐二年

三月北兵屠城之禍年二十九矣

又答聰上人書僕自貞祐甲戌南渡河時犬馬之齒

二十有五

廷堪案元史太祖本紀八年癸酉是秋命皇子朮
赤察台窩闊台爲右軍循太行而南取保遂安肅
安定邢洛磁相衛輝懷孟掠澤潞遼沁平陽太原
吉陽拔汾石嵐忻代武等州而還癸酉爲至甯元
年卽貞祐元年與墓銘所稱貞祐二年三月者不

同

又案是年五月宣宗遷都南京

三年乙亥二十六歲

廷堪案是年五月蒙古破中都先生西園詩哀中

都之破而作也

四年丙子二十七歲

忻州被兵奉母張夫人南渡河寓居福昌縣之三鄉鎮
十月蒙古破潼關避兵於女儿

先生故物譜貞祐丙子之兵藏書壁間得存兵退奉
先夫人南渡河舉而付之太原親舊家自餘雜書及
先人手寫春秋三史莊子文選之等尙千餘冊并畫
百軸載二鹿車自隨三研則瘞之鄭村別墅是歲寓
居三鄉其十月北兵破潼關避於女儿之三潭比下
山則焚蕩之餘蓋無幾矣

廷堪案金史地理志南京路嵩州福昌縣有女兒山又有三鄉鎮卽先生避兵所居也

又案前答聰上人書作甲戌南渡河此又云丙子南渡河二者恐有一誤

又案墓銘稱先生妣河南縣君張氏蓋隴城府君之配也

又案是年有女兒山避兵送李長源歸關中詩又虞坂行自注丙子夏將南渡河道出虞坂感而有作再集中如涌金亭示同游諸君及嘯臺感遇諸詩皆當作於是年涌金亭詩中云我從汾晉來山

之面目腹背皆經過濟源盤谷非不佳煙景獨覺
蘇門多語氣亦是踰太行而南初入懷衛光景乾
隆癸卯在京師大興翁覃溪師曾以此詩石刻見
示中唯空青斷石壁微茫散煙螺與集作散煙蘿
者小異餘皆同書法道美頗類虞永興是知先生
亦善書也

興定元年丁丑二十八歲

在三鄉撰錦機一卷以詩文見禮部尙書趙秉文

先生錦機引興定丁丑閒居河南始集前人議論爲

一編以便觀覽

又趙閑閑真贊興定初始以詩文見故禮部閑閑公
公若以爲可教爲延譽諸公閒又五年仍得以科第
出公門

郝經先生墓銘從先大父學先大父卽與倡和或者
譏其不事舉業先大父言吾政不欲渠爲舉子爾區
區一第不足道也遂令肆意經傳貫串百家六年而
業成下太行渡大河爲箕山琴臺等詩趙禮部見之
以爲少陵以來無此作也以書招之於是名震京師
目爲元才子

廷堪案金史趙秉文傳秉文字周臣大定三十五

年進士拜禮部尙書卒年七十四閑閑其自號也
著有滄水集後爲先生座主又本集有三鄉時作
七絕一首又論詩絕句三十首自注云丁丑歲三
鄉作皆是年也

二年戊寅二十九歲

三年己卯三十歲

第三女阿秀生

先生孝女阿秀墓銘孝女阿秀奉直大夫尙書省令
史元好問第三女也興定己卯生於登封

廷堪案墓銘載先生女五人長曰真適進士東勝

程思溫次嚴女冠詔爲宮教號浯溪真隱次順早
卒次適陳和郎大都惠民司提點太原翟國才次
適建德路織染局大使定襄霍繼祖考孝女阿秀
年十四以開興壬辰三月朔死與墓銘所謂次順
早卒者合則阿秀當名順郭氏全金詩云三女順
集中有示女珍詩珠圍翠繞三花樹李白桃紅一
捻春看取元家第三女他年眞作魏夫人順當作
珍四女名柔則阿秀又名珍矣元蔣正子山房隨
筆稱先生有妹爲女冠能詩先生之妹爲女冠無
可考或恐因次女嚴爲女冠而致誤耳

又秦阿秀墓銘作於天興元年所謂尙書省令史者卽尙書省掾也與本傳合

四年庚辰三十一歲

在河南與李純甫雷淵李獻能同遊玉華谷

李純甫題古仙人辭後興定庚辰夏六月望予與元好問趙郡李獻能同遊玉華谷又將歷崧前諸刹因憩於少姨廟元周行廊廡得古仙人辭於壁間

廷堪案本集有同希顏欽叔玉華谷分韻得軍華二字詩二首又有同希顏欽叔玉華谷還會善寺卽事詩二首中州集雷御史淵有玉華山中同裕

之分韻送欽叔得歸字詩李右司獻能有玉華谷
同希顏裕之分韻得秋字詩考金史雷淵傳淵字
希顏一字季默應州渾源人登至甯元年詞賦甲
科興定末拜監察御史文藝傳李純甫字之純宏
州襄陰人擢承安二年經義進士章宗南征兩上
疏策勝負上奇之薦入翰林元兵起論時事不報
正大末改京兆府判官卒於汴李獻能字欽叔河
中人貞祐三年廷試第一人授應奉翰林文字出
爲鄜州觀察判官復爲應奉俄遷修撰正大末以
鎮南軍節度副使充河中帥府經歷元兵破河中

奔陝州行省以權左右司郎中值趙三三軍變遇
害餘皆詳先生中州集及劉京叔歸潛志也

又案本集西園詩自注興定庚辰八月中作

又案金初之文皆遼宋故習大定明昌中趙周臣
李之純楊之美始振興之至宣宗南渡雷希顏李
欽叔宋飛卿冀京父李長源王仲澤麻知幾辛敬
之王飛伯諸人出始爲極盛故歸潛志云泰和大
安以來科舉之文敝蓋有司惟守格法無育才心
文風益衰及宣宗南渡貞祐初趙閑閑爲省試有
司得李欽叔賦大愛之擢爲第一又擢麻知幾爲

策論魁於是舉子輩譁然俄欽叔中宏詞科入翰林眾始厭服正大中欽叔復爲省試有司得史學優賦大愛之亦擢爲第一於是舉子輩復大譟俄學優對廷策中之議者亦息又云南渡後文風一變文多學奇古詩多學風雅由趙閑閑李屏山倡之故能一掃遼宋餘習而雷希顏宋飛卿諸人皆作古文趙閑閑晚年詩多法唐人李杜諸公已而麻知幾李長源元裕之輩鼎出故後進作詩者爭以唐人爲法也先生自貞祐南渡河與諸鉅公遊所得師友之益日多故能鬱爲一代宗工蓋先生

之生實閒氣所鍾集金之大成開元之先聲以主
持數百年文章氣運非偶然也集中有李屏山挽
章二首趙閑閑眞贊四哀詩諸作益以見先生於
師友之誼甚摯云屏山卽之純也四哀者李欽叔
冀京父李長源王仲澤也欽叔卽獻能京父中州
集云冀禹錫字京父龍山人崇慶二年進士正大
中奏充知事官奴之變乃自投水中歸潛志云京
父值蒲察官奴之變與宰相李蹊同見殺年四十
三與中州集異長源金史文藝傳云李汾字長源
平晉人爲人尙氣喜讀史工詩元光閒舉進士不

第去客唐鄧閒恆山公武仙署爲行省講議官旣
而仙與參知政事完顏思烈相異同懼汾欲除之
汾遁泌陽仙追獲之絕食而死年未四十歸潛志
云爲仙麾下所殺與史異仲澤中州集云王渥字
仲澤以字行興定二年進士正大七年朝廷與宋
人議和擇可爲行人者仲澤以才選凡再至揚州
制司宋人愛其才有中州豪士之目八年權右司
郎中中牟失利不知所終歸潛志云天興改元渥
從赤盞合喜兵援武仙鄭州西遇北兵大戰歿於
陣亦與中州集異

五年辛巳三十二歲

登進士第座主趙秉文

金史本傳中興定五年第

郝經先生墓銘登興定五年進士第不就選

廷堪案先生趙閑閑真贊云興定初始見閑閑公
又五年仍得以科第出公之門又閑閑公墓銘云
公之葬也孤子似以好問公門下士來速銘又有
野菊座主閑閑公命作詩

元光元年壬午三十三歲

二年癸未三十四歲

往來箕穎與馮璧雷淵李治劉從益李獻能麻九疇張
穀辛愿李汾王鬱劉光謙白華史學諸人爲友相倡和
著述日富

先生真定府學教授常君墓銘元光癸未予過鄆城
見麻徵君知幾

又葉縣中嶽廟記癸未之夏予過昆陽

郝經先生墓銘往來箕穎閒數年而大放厥辭於是
家按其什人嚼其句洋溢於里巷吟諷於道塗巍然
坡谷復出也

廷堪案郝伯常所謂往來箕穎大放厥辭應在此

時集中如箕山緱山置酒同希顏再登箕山光武
臺潁亭留別灑亭潁谷封人廟贈答劉御史雲卿
度太白嶺往昆陽楚漢戰處同欽叔賦諸詩皆當
作於此數年歸潛志云余先子翰林令葉時同坊
州郝仲純賦昆陽懷古詩諸公多繼作先子有云
營屯滢水橫陳處計墮劉郎小怯中天上雷風掃
妖氣人間虎豹畏真龍千秋一片昆溪月曾照堂
堂蓋世雄郝云戰骨至今埋滢水暮雲何處是春
陵李長源云潁川南下鬱陂陁遐想當年戰壘多
自是真人清宇宙誰爲豎子試干戈元裕之云英

風未覺消沈盡試向春陵望鬱蔥王飛伯云落日
一川英氣在西風萬葉戰聲來後云誰倚城樓弔
興廢一聲長笛暮雲開李欽叔白文舉史學優皆
有詩余亦作一古詩也考先生中岳廟記癸未過

昆陽則作詩當在是年再考志所稱先子翰林者

卽劉從益也從益爲京叔之父字雲卿渾源人大

安元年進士有蓬門集見金史文藝傳馮璧字叔

獻真定人承安二年經義進士李治字仁卿樂城

人登金進士第元至元二年以學士召就職麻九

疇字知幾易州人正大初特賜進士張穀字伯玉

許州人張轉運毅之弟辛愿字敬之福昌人不仕
王鬱字飛伯大興人劉光謙字達卿瀋州人泰和
三年進士白華字文舉澳州人貞祐三年進士天
興二年叛降宋史學字學優河南人正大中進士
以上並見金史中州集歸潛志元史諸書

哀宗正大元年甲申三十五歲

五月試宏詞科程文爲章宗皇帝鐵券行引秦王擒寶
建德降王世充露布光武中興頌大司農箴

先生趙閑閑真贊正大甲申諸公貢某詞科公爲監
試官以例不赴院宿一日坐禮曹欽叔從外至誦某

秦王破寶建德降王世充露布公頗爲聳動顧座客
陳司諫正叔言人言我黨元子誠黨之邪公之篤於
自信如此

廷堪案本集章宗皇帝鐵券行引秦王擒寶建德
降王世充露布題下注云二篇正大元年五月應
辭科程文餘二篇光武中興頌大司農箴亡不及
錄又擬賀登寶位表擬立東宮詔擬除樞密使制
擬御史大夫讓樞密使表擬除司農卿制五篇題
下注云正大元年奉都堂鈞旨作蓋在試前也

又案野菊詩當作於是年歸潛志云正大初趙閑

閑長翰林苑同陳正叔潘仲明雷希顏元裕之諸
人作詩會嘗賦野菊趙有云岡斷秋光隔河明月
影交荒叢號蟋蟀病葉挂蠨蛸欲訪陶彭澤柴門
何處敲諸公稱其破的也今考先生有野菊座主
閑閑公命作及野菊再奉座主閑閑公命作二詩
皆七言律見集中

二年乙酉三十六歲

在京師權國史院編修夏還居嵩山作杜詩學

先生吏部掾屬題名記正大二年五月日儒林郎權

國史院編修官元某記

又警巡院廨署記同

又杜詩學引乙酉之夏自京師還閒居嵩山因錄先君子所教與聞之師友之間者爲一書名曰杜詩學
廷堪案歸潛志云元裕之李長源同鄉里各有詩名由其不相下頗不相咸李好憤怒元嘗云長源有憤擊經元好滑稽李輒以詩譏罵元亦無如之
何元嘗權國史院編修官時末帝召故駙馬都尉僕散阿海女子入宮俄以人言其罪又蒙放出元因賦金谷怨樂府詩李見之作代金谷佳人答一篇以拒焉一時士人傳以爲笑談元詩云娃兒十

八嬌可憐亭亭裊裊春風前天上仙人玉爲骨人
閒畫工畫不出小小油壁車軋軋出東華繡帶盤
綾結雲裾踏雁沙嬌雲一片不成雨被風吹去落
誰家豈無年少恩澤侯錦韉貂帽亦風流不然典
取鸚鵡裘四壁相如堪白頭金谷樓臺杳無主燕
子不飛花著雨只知環佩作離聲誰解琵琶得私
語有情蜂雄蛺蝶雌無情雞欺翡翠兒勸君滿飲
金屈卮明日無花空折枝李詩云石家園林洛水
濱粉垣碧瓦迷天津樓臺參差映金谷歌舞日日
嬌青春是時天下甲兵息江南已傳歸命臣永平

以來太康治四海一家無窮人洛陽城中厭醜醜
司隸夜過不敢喚王門戚里事豪侈車馬如水爭
紅塵燒金斫玉延上客季倫豈輸趙王倫兩家炎
炎貴相軋笙竽嘈嘈妓成列珊瑚紅樹鞭擊碎步
障青絲馬踏裂因緣睚眦貴人怒詔下黃門促收
捕郵夫防吏急喧驅河南牒繫御史府鐘鳴漏盡
行不休生存華屋歸山邱綠珠香魂宛塵土侍兒
忍居樓上頭君王慈明宥率土妾身蠶居籍民伍
平生作得健兒婦狗走雞飛豈敢惡元和其詩先
子稱工考先生以乙酉權國史院編修官次年除

鎮平令則是詩作於乙酉可知志所稱末帝蓋哀宗也再考金史李長源元光閒舉進士不中用薦爲史館書寫時趙秉文爲學士雷淵李獻能皆在院長源不之下秉筆諸人積不平而雷李尤切齒當在此時而先生獨不以爲忤長源被害爲詩以哀之復編其詩於中州集始終懇懇亦可見其友誼之篤矣長源此詩中州集全金詩皆不載先生詩亦與集多異又先生和詩曰後芳華怨見集中又案本集有乙酉六月十一日雨詩

三年丙戌三十七歲

除鎮平令

郝經先生墓銘初筮仕除鎮平令

廷堪案郝伯常稱先生初除鎮平令再轉內鄉考

先生乙酉歲居嵩山丁亥已轉內鄉令則官鎮平

時應在丙戌

又案本集有從鄧州相公覓酒時在鎮平及鎮平

止平丸寄姪孫伯安筆鎮平書事自鎮平暫往秋林道中

具寄家諸詩

四年丁亥三十八歲

轉內鄉令

韓先生長慶新泉記鄧之西百里而遠是爲內鄉之東
四平鄙有山焉其麓二泉灌田千畝有奇今以其地名之
長慶泉正大丁亥予承乏是邑

五年戊子三十九歲

在內鄉營長壽新居

先生行齋賦序戊子冬十月長壽新居成仲經張君
從予卜鄰

廷堪案中州集張參議澄字之純別字仲經本出
遼東烏惹族國初遷之隆安

又案本集有戊子正月晦日內鄉西城遊眺

觀浙江漲詩自注時拜大赦五日矣考金史哀宗
紀正大五年六月壬戌以旱赦雜犯死罪以下則
詩當作於此時又考金史地理志南京路鄧州武
勝軍內鄉縣有浙水水經注浙水出析縣西北宏
農盧氏大蒿山則浙水卽析水也漢書地理志析
縣屬宏農郡後漢書郡國志屬南陽郡皆作析隋
書地理志浙陽郡始作浙卽今浙川縣也皆以浙
水得名本集誤浙爲浙時浙江屬南宋先生何由
而至乎

又案先生時作令內鄉浙水在縣境故往觀之顧

俠君以爲郎陽者亦非

又案本集記夢詩天上材官老不材從教兀兀走
塵埃夢中望拜通明殿曾見金書兩字來自注戊
子七月二十四日內鄉往盧氏宿走馬平夜夢拜
天帝像遂觀法駕導引畫幄最前負弩三人中有
金書小字題裕之者夢中不自知其爲予也則知
先生是年又嘗至盧氏

六年己丑四十歲

子阿千生作東坡詩雅丁母張夫人憂居內鄉白鹿原
構新齋於菊水上讀書其間

先生子阿千始生詩四十舉兒子提孩聊自誇

又東坡詩雅引作東坡詩雅目錄一篇正大己丑河

南元某書於內鄉劉鄧州光父之東齋

又新齋賦序予既罷內鄉出居縣東南白鹿原結茅
菊水之上聚書而讀之

郝經先生墓銘再轉內鄉遂丁艱憂

廷堪案墓銘載先生子男三人長曰撫奉直大夫

汝州知州兼管諸軍奧魯勸農事次曰振太原路

參佐次曰搃尚書都省監印繹詩意則阿千當屬

先生長子撫也

又案墓銘終喪辟南陽令考先生官南陽歲在辛卯則居喪應在己庚間

又案中州集劉鄧州祖謙字光甫安邑人承安五年進士正大初除武勝軍節度副使

七年庚寅四十一歲

居喪劉祖謙辟爲從事不就

先生竹林禪院記正大庚寅予閒居空空廣因進士康國仲甯以記請因爲記其事四月望日前內鄉令元某記

廷堪案集中有謝鄧州帥免從事之辟詩云憂端

擾擾力難任世事駸駸日見臨三載素冠容有愧
一時墨經果何心首邱自擬終殘喘陟屺誰當辨
苦音遙望朱門涕橫落相公恩德九原深先生蓋
不忍爲奪情之舉也

八年辛卯四十二歲

終喪辟南陽令配張氏病歿內遷尙書都省掾

郝經先生墓銘終喪正大中辟中州南陽令南陽大
縣兵民十餘萬帥府令兼鎮撫甚有威惠

又配同郡張氏戶部尙書林卿之女再配臨清毛氏
權貨司提舉飛卿之女

先生孝女阿秀墓銘年十三予爲南陽令其母張病
歿孝女日夜哭泣明年得病於汴梁

廷堪案本集宛邱歎自注髯李令南陽後十年予
爲此縣辛卯七月農司檄予按秦陽陂田又有京
居辛卯八月六日作詩考郝伯常墓銘於正大中
辟南陽令後卽云詔爲尙書都省掾居無何除左
司都事再轉爲中順大夫行尙書省左司員外郎
兼修起居注上騎都尉河南縣開國子食邑五百
戶賜金紫魚袋天興初入翰林知制誥金亡不仕
入翰林知制誥繫之於天興初則其餘皆當在是

年也京居詩蓋內遷時作又先生良佐碑云爲東
曹掾吏部主事在天興元年金史哀宗紀先生由
尙書省掾爲左右司員外郎在天興二年再考金
史百官志尙書省左司員外郎一員正六品都事
二員正七品右司同先生爲左司都事亦在天興
二年見完顏奴申傳皆與墓銘互異今據本集及
金史編緝而附記墓銘於此以備考

又案金史哀宗紀正大八年四月大元兵平鳳翔
府則集中岐陽詩三首當作於是年也

天興元年壬辰四十三歲

在京師官東曹掾吏部主事冬哀宗將東狩先生言於
時相請以小字書國史一本隨駕未及行是年三月女
阿秀死

金史本傳天興初擢尙書省掾

先生鎮南軍節度使良佐碑天興元年六月故禦侮
中郎將陳和尚死節事聞詔擇文臣相與往來者爲
褒忠廟碑宰相以東曹掾吏部主事臣某應詔

又趙閑閑真贊壬辰冬某以東曹掾知雜權都司取
行止卷觀之見公獨銜及楊雷猥相薦引者十七章
又南冠錄引京城之圍予爲東曹都事知舟師將有

東狩之役言於諸相請以小字書國史一本隨車駕
且所在以一馬負之時相雖以爲然而不及行也

又阿秀墓銘以開興壬辰三月朔死

立自 廷堪案本傳云天興初擢尙書省掾頃之除左司

都事與墓銘異亦與辛卯京居詩不合先生文中

所謂東曹卽左司也蓋先生由南陽令擢尙書省

掾當在去年辛卯而遷左司都事則在是年也

又案是年正月改元開興四月始改元天興十二

月哀宗出奔河北蒙古速不臺圍南京本集有壬

辰十二月車駕東狩後卽事詩五首

二年癸巳四十四歲

蒙古速不臺圍京城甚急時先生爲左司都事白留守
完顏奴申及副樞完顏習捏阿不欲立二王監國效春
秋紀季入齊之義以全兩宮及皇族二王荆王曹王也
議未決明日西面元帥崔立反殺奴申阿不以太后令
立衛王子從恪爲梁王監國以先生爲左右司員外郎
立自稱鄭王遂送款蒙古脇百官父老立碑頌功德劫
太學生劉祁撰文磨甘露碑刻之四月先生至青城五
月北渡

金史完顏奴申傳天興二年正月戊辰省令史許安

國詣講議所言古者有大疑謀及卿士謀及庶人今
事勢如此可集百官及僧道士庶問計左司都事元
好問以安國之言白奴申奴申曰此論甚佳可與副
樞議之副樞亦以爲然好問曰自車駕出京今二十
日許又遣使迎兩宮民間洶洶皆謂國家欲棄京城
相公何以處之阿不曰吾二人惟有一死耳好問曰
死不難誠能安社稷救生靈死而可也如其不然徒
欲一身飽五十紅衲軍亦謂之死耶阿不款語曰今
日惟吾二人何言不可好問乃曰聞中外人言欲立
二王監國以全兩宮與皇族耳阿不卽命召京城官

民明日皆聚省中論以事勢危急當如之何有父老
七人陳詞二相命好問受其詞白之奴申願曰亦爲
此事也或曰是時外圍不解如在陷穽議者欲推立
荆王以城出降是亦春秋紀季入齊之義况北兵中
已有曹王也奴申拱立無語獨阿不反覆申論且繼
以涕泣明日戊辰崔立與其黨爲變

又哀宗紀天興二年正月戊辰安平都尉京城西面
元帥崔立舉兵爲亂殺參知政事完顏奴申樞密副
使完顏斜捨阿不勒兵入見太后立衛王子從恪爲
梁王監國自稱左丞相都元帥尙書令鄭王弟倚平

章政事侃殿前都點檢其黨字尤魯長河御史中丞
韓鐸副元帥兼知開封府折希顏藥安國張軍奴完
顏合答並元帥師肅左右司郎中賈良兵部郎中兼
右司都事又署工部尙書溫迪罕二十吏部侍郎劉
仲周並爲參知政事宜徽使奧屯舜卿爲尙書左丞
戶部侍郎張正倫爲尙書右丞左右司都事張節爲
左右司郎中尙書省掾元好問爲左右司員外郎都
轉運知事王天祺懷州同知康瑋並爲左右司都事
遂送款大元軍前癸酉元將碎不斛進兵汴京四月
癸巳以梁王從恪荆王守純及諸宗室男女五百餘

人至青城皆及於難甲午兩宮北遷

又崔立傳二相遇害立還省中議所立立曰衛紹王太子承恪其妹公主在北兵中可立之乃召承恪以太后誥命梁王監國百官拜舞山呼承恪受之凡除拜皆以監國爲辭

又王若虛傳天興元年哀宗走歸德明年春崔立變羣小附和請爲立建功德碑崔奕以尙書省命召若虛爲文時奕輩恃勢作威人或少忤則讒構立見屠滅若虛自分必死私謂左右司員外郎元好問曰今召我作碑不從則死作之則名節掃地不若死之爲

愈雖然我姑以理論之乃謂奕輩曰丞相功德碑當指何事爲言奕輩怒曰丞相以京城降活生靈百萬非功德乎曰學士代王言功德碑謂之代王言可乎且丞相旣以城降則朝官皆出其門自古豈有門下人爲主帥誦功德而可信乎後世哉奕輩不能奪乃召太學生劉祁麻革輩赴省好問張信之喻以立碑事曰眾議屬二君且已白鄭王矣二君其無讓祁等固辭而別數日促迫不已祁卽爲草定以付好問好問意未愜乃自爲之旣成以示若虛乃共刪定數字然止直敘其事而已後兵入城不果立也

先生內翰王公墓表崔立劫殺宰相送款行營羣小
獻諂請爲立建功德碑以都堂命召公爲文喋血之
際翟奕輩恃勢作威公自分必死奕輩不能奪竟脇
太學生託以京城父老意而爲之公之執義不同者
蓋如此

劉祁歸潛志錄崔立碑事崔立旣變以南京降自負
其有救一城生靈功謂左司員外郎元裕之曰汝等
何時立一石書吾反狀耶時立國柄入手生殺在一
言省庭日流血上下震悚諸在位者畏之於是乎有
立碑頌功德議數日忽一省卒詣予家齋尙書禮房

小帖子云首領官召赴禮房予初愕然自以布衣不預事不知何謂卽往至省門外遇麻信之予因語之信之曰昨日見左司郎中張信之言鄭王碑事欲屬我輩作豈其然耶卽同入省禮房省掾曹益甫引見首領官張信之元裕之二人曰今鄭王以一身救百萬生靈其功德誠可嘉今在京官吏父老欲爲立碑紀其事眾議屬之二君且已白鄭王矣二君其無讓予卽辭曰祁輩布衣無職此非所當爲況有翰林諸公如王丈從之及裕之輩在祁等不敢裕之曰此事出於眾心且吾曹生自王得之爲之何辭君等無讓

予卽曰吾當見王丈論之裕之曰王論亦如此矣予
卽趨出至學士院見王丈時修撰張子忠應奉張元
美亦在焉予因語其事且曰此事諸公職某輩何與
焉王曰此事議久矣蓋以院中人爲之若尙書檄學
士院作非出於在京官吏父老心若自布衣中爲之
乃眾欲也且子未仕在布衣今士民屬子子爲之亦
不傷於義也余於是陰悟諸公自以仕金顯達欲避
其名以嫁諸布衣又念平生爲文今而遇此患難以
是知揚子雲劇秦美新其亦出於不得已邪因遜讓
而別連延數日又被督促知不能辭卽略爲草定付

裕之一二日後一省卒來召云諸宰執召君余不得
已赴省途中遇元裕之騎馬索予因劫以行且拉麻
信之俱往初不言碑事止云省中召王學士諸公會
飲余亦陰揣其然既入卽引詣左參政幕中見參政
劉公謙甫舉杯屬吾二人曰大王碑事眾議煩公等
公等成之甚善余與信之俱遜讓曰不敢已而謙甫
出見王丈在焉相與酬酢酒數行日將入矣余二人
告歸裕之曰省門已鎖今夕旣飲當留宿省中余輩
無如之何已而燭至飲余裕之倡曰鄭王碑文今夕
可畢手也余曰有諸公在諸公爲之王丈謂余曰此

事鄭王已知眾人請太學中名士作子如堅拒使王
知諸生輩不肯作是不許其以城降也則銜之刻骨
縉紳俱受禍矣是子以一人累眾也且子有老祖母
老母在堂今一觸其鋒禍及親族何以爲智子熟思
之余惟以非職辭久之且曰余旣爲草定不當諸公
意請改命他人諸公不許促迫甚余知其事無可奈
何則曰吾素不知館閣體今夕諸公共議之如諸公
避其名但書某名在諸公後於是裕之引紙落筆草
其事王丈又曰此文姑使裕之作以爲君作又何妨
且君集中不載亦可也余曰裕之作政宜某復何言

碑文既成以示王丈及余信之欲相商評王丈爲定
數字其銘詞則王丈裕之信之及存余舊數言其碑
序全裕之筆也然其文止實敘事亦無褒稱立言時
夜幾四鼓裕之趣曹益甫書之裕之卽於燭前焚其
藁遲明余輩趨去後數日立坐朝堂諸宰執首領官
共獻其文以爲壽遂召余信之等俱詣立第受官余
輩深懼見立俄而諸首領官齋告身三通以出付余
輩曰特賜進士出身因爲余輩賀後聞求巨石不得
省門左舊有宋徽宗時甘露碑有司取而磨之工書
人張君庸者求書刻方畢北兵入城縱剽余輩狼狽

而出不知其竟能立否也嗟乎諸公本畏立禍不敢
不成其言已而又欲避其名以賣布衣之士余輩不
幸有虛名一旦爲人之所劫欲以死拒之則發諸公
嫁名之機諸公必怒怒而達崔立禍不可測則吾二
親何以自存吾之死所謂自經於溝瀆而莫之知且
輕殺吾身以憂吾親爲大不孝矣況身未祿仕權義
之輕重親莫重焉故余姑隱忍保身爲二親計且其
文皆眾筆非余全文彼欲嫁名於余余安得而辭也
今天下士議往往知裕之所爲且有曹通甫詩楊叔
能詞在亦不待余辯也因書其首尾之詳以誌少年

之過空山靜思可以一笑

廷堪案崔立功德碑事爲先生生平一大疑案今反覆詳考知其爲劉京叔所撰無疑也他不具論歸潛志乃京叔所自著之書載撰文始末甚詳其語皆游移無定蓋有愧於中而不覺其詞之遁也試卽其所記而論之其曰以是知揚子雲劇秦美新出於不得已是以揚雄自解其撰文之慚也其曰欲以死拒則吾二親何以自存是以二親自釋其撰文之罪也其曰知不能辭卽略爲草定則已自承不諱矣乃云其文皆眾筆其誰信之其曰齋

告身三通付余輩則已受賞不辭矣乃云諸公欲
嫁名又誰信之旣以碑序誣先生矣而曰銘辭存
余舊數言則天良蓋不容盡泯焉旣以起草屬先
生矣而曰書某名在諸公後則真情或有時一露
焉其曰並無褒稱崔立之言夫諛詞非出己手何
煩代爲末減乎況陵川集有林希極口吠堯之語
爲明徵也其曰王丈爲定數字夫惡名已有所歸
何事過爲株連乎況金史有王若虛以死自誓之
文爲左驗也良由當時迫於威勢事後物論不容
欲辭其名難昧其實聊爲此以分己之謗耳易傳

曰誣善之人其辭游失其守者其辭屈其京叔之
謂歟金詩紀事未見歸潛志足本乃謂先生受謗
不爲無因亦昧於知人論世矣辨詳下卷己亥年
又案完顏奴申傳天興元年正月戊辰集官民間
計又曰明日戊辰崔立與其黨爲變哀宗紀亦云
正月戊辰崔立爲亂則奴申傳兩戊辰必有一誤
又奴申傳先生已爲左司都事而哀宗紀乃云以
尙書省掾元好問爲左右司員外郎亦小異至墓
銘所謂天興初入翰林知制誥者未審在何時也
又案本集俳體雪香亭雜詠十五首當作於是年

考金史地理志南京純和殿正寢也純和西曰雪
香亭亭北則后妃位也此禁掖嚴密之地是年四
月癸巳崔立送二王及諸宗室於蒙古甲午兩宮
北遷故先生入覽故宮而興感也今詳詩中有云
爲向杏園雙燕道營巢何處過明年是時金源妃
主始遷青城曰過明年者借雙燕而傷身世之飄
零也又云若爲常得熙春在時上高層望宋州是
時哀宗車駕尙在歸德曰望宋州者借登樓而念
君臣之瑣尾也又云批奏內人輪上直去年名姓
在窗閒言故君去冬始東狩也又云重來未必春

風在更爲梨花住少時言此身今夏將北渡也雖
未明紀歲月而行閒紙上歷歷可尋况哀宗於是
年五月始走蔡州今詩尙云望宋州宋州者歸德
也則在五月以前可知又詩中如海棠流鶯暮春
等語景物亦在三月四月之交皆可爲作於癸巳
年未北渡之證楊升庵藝林伐山以爲詠宋徽宗
時事誤不待言金詩紀事辨之曰遺山集中雪香
亭雜詠乃金亡之後重過汴宮而作黍離之感觸
目興懷白髮纍臣自傷故國非爲隔代詠也其說
當矣然不知卽作於癸巳年未北渡之時而漫云

重過汴宮是於先生詩亦未之深考也又王文簡
詠先生詩蘭成賸有江南賦落日青山望蔡州誤
宋州爲蔡州蓋以金亡於蔡州故云然不知作是
詩時哀宗尙未至蔡州也又純和殿詩中作醕和
與金史異

又案金史悉本楊煥然汴故宮記仁安殿之次曰
純和殿西曰雪香亭故本集題下注云亭在故汴
宮仁安殿之西也

又案本集癸巳四月二十九日出京詩云塞外初
捐宴賜金此言蒙古初起也當時南牧已駸駸此

言中都繼陷也。只知灞上真兒戲。此言武仙鄭州
之潰也。誰謂神州遂陸沈。此言崔立汴京之降也。
華表鶴來應有語。此言徙百官也。銅槃人去亦何
心。此言遷重器也。興亡誰識天公意。留著青城閣
古今。此哀二王之被害兩宮之播越也。又有癸巳
五月三日北渡詩三首。又南冠行自注。癸巳秋爲
曹得一作。又癸巳除夜詩云。更殘鐘未動。猶屬出
京年。則先生北渡在天興。癸巳明甚。堯山堂外紀
庶齋老學叢談諸書以爲在壬辰者皆誤。

三年甲午四十五歲

羈管聊城作南冠錄

先生清真觀記歲甲午余自大梁羈管聊城

又南冠錄引歲甲午羈管聊城益之兄邈在襄漢遂
有彼疆此界之限姪傳仔繫之平陽存亡未可知伯
男子叔儀姪孫伯安皆尙幼未可告語余年已四十
有五殘息淹淹朝夕待盡使一日顛仆於道路則世
豈復知有河南元氏哉乃手寫千秋錄一篇付女嚴
以備遺忘

又學東坡移居詩我作南冠錄一語不敢私稗官雜
家流國風賤婦詩成書有作者起本良在茲

廷堪案是年正月戊申哀宗在蔡州傳位於東面
元帥承麟是爲末帝己酉蔡州破哀宗自縊於幽
蘭軒末帝被害金亡

又案本集學東坡移居詩八首當作於是年詩中
有云壬辰困重圍金粟論升勺明年出青城瞑目
就束縛毫釐脫鬼手攘臂留空橐聊城千里外狼
狽何所託此其證也又云去年住佛屋盡室寄尋
丈今年僦民居卧榻礙盆盎考密公寶章小集詩
自注甲午三月二十有一日爲輔之書於聊城至
覺寺之寓居卽所謂住佛屋者蓋在未移居之前

也

又案本集甲午除夕詩暗中人事忽推遷坐守寒
灰望復然已恨太官餘麪餅空教漢水入膠船神
功聖德三千牘大定明昌五十年甲子兩周今日
盡空將衰淚灑吳天此詩首句哀金社之已墟次
句冀金源之復振三句感汴京之被圍四句痛義
宗之不返五句言禮樂之明備而懼國史之淪亡
也六句言章廟之澂平而思興陵之德澤也七句
則紀金代享國之數也八句則傷纍臣去國之情
也一篇之中故君故國之思纏綿悱惻先生真完

顏氏忠臣也

又案集中有得姪傳信二首及懷益之兄詩考南
冠錄引歲甲午羈管聊城益之兄邈在襄漢又云
姪傳俘繫之平陽存亡未知此三詩或當作於是
年也又姪傳一本作姪搏先生承奉河南元公墓
銘云公諱升字德清兄隴城府君則先生叔父也
又云無子以從孫好謙之子搏奉其後亦作搏字
與先生子撫振摠偏旁俱同則作傳字者蓋誤

又案淮右詩及續小娘歌皆作於是年淮右詩云
淮右城池幾處存宋州新事不堪論輔車謾欲通

吳會突騎誰當擣
薊門細水浮花歸
別澗斷雲含雨入
孤村空餘韓偓傷
時語留與纍臣一
斷魂續小娘歌云
黃河千里扼兵衝
虞虢分明在眼中
爲向淮西諸將道
不須誇說蔡州功
並譏宋人渝盟助
蒙古以蹙金而自
失輔車唇齒之計
也

元遺山先生年譜卷上終

元遺山先生年譜卷下

讀書山房刻本

歛凌廷堪次仲編

平定張穆碩洲訂

蒙古太宗七年乙未四十六歲

與李天翼杜仁傑遊濟南

先生濟南行記予兒時嘗過濟南然但能憶其大城
府而已乙未秋七月始以故人李君輔之之故而得
一至焉

廷堪案自是而後先生在蒙古故以蒙古紀年時
蒙古尙未有年號是年亦爲宋理宗端平二年也
又案本集有半山亭招仲梁飲詩泛舟大明湖詩

自注待杜子不至濟南行記亦云泛大明待杜子
不至杜子卽仲梁也又有送李輔之官青州詩攷
中州集李警院天翼字輔之固安人貞祐二年進
士汴梁旣下辟濟南漕司從事全金詩杜仁傑字
仲梁一字善夫濟南長清人元時參徵不起與先
生善先生嘗稱其詩似李長源麻知幾也

又案集中乙未正月九日立春詩云重碧總誇燕
市酒小紅誰記上林花又濟南雜詩云別有洞天
君不見鵲山寒食秦和年是亦旄邱之誕節宗周
之行邁也

八年丙申四十七歲

客冠氏令趙天錫所三月偕天錫往泰安會行臺嚴實
因遊泰山旋返冠氏六月馮內翰璧見過九月作東坡
樂府集選

先生東游紀略丙申三月二十有一日冠氏趙侯將
會行臺於泰安侯以予宿尙遊觀拉之偕行凡三十
日往復千里

又贈馮內翰詩序內翰馮丈往在京師日渾源雷淵
希顏太原王渥仲澤河中李獻能欽叔龍山冀禹錫
京父皆從之問學某亦得俎豆於門下士之末然自

辛卯壬辰以來不三四年而五人者唯不肖在耳丙申夏六月公自東平將展墓於鎮陽以某在冠氏枉駕見過

又東坡樂府集選引丙申九月朔書於陽平寓居之東齋

廷堪案元史趙天錫傳天錫字受之冠氏人辛巳春歸行臺嚴實以功授冠氏令戊戌征宋還卒於冠氏又嚴實傳實字武叔泰安長清人庚辰七月來歸木華黎承制拜實金紫光祿大夫行尙書省事辛巳攻東平入居之甲午授東平路行軍萬戶

庚子卒年五十九中統二年追封魯國公謚武惠
是時當金亾之後嚴實能養士故金之故老中州
之名士多往歸之而天錫爲冠氏令亦嘗延致名
儒攷論今古先生自癸巳北渡至戊戌還鄉客冠
氏者凡數年皆依天錫以居者也

又案歸潛志馮內翰璧字叔獻致仕歸嵩山結茅
玉峰下自號松庵徜徉泉石閒釀酒名松醪味勝
京師採蘭置室中與山僧野客作鬪蘭會壬辰之
亂北歸由東平至鎮陽以歿年七十有九又先生
內翰馮公神道碑銘尙憶公還鎮陽過好問冠氏

語及舊事往往色揚而神躍正指是年事叔獻眞
定人故云還鎮陽所謂由東平者蓋自嚴實處來
也

又案冠氏縣爲漢館陶縣地宋書州郡志魏分東
郡及魏郡爲陽平郡治館陶縣故先生每稱冠氏
爲陽平也

九年丁酉四十八歲

客冠氏冬往東平

先生興福禪院功德記丁酉之秋見淨文於山陽蓋
自河南歷大名東平訪予而及之

又遽然子墓碣銘丁酉冬復來東州

廷堪案是年亦爲宋理宗嘉熙元年

又案先生是年嘗至懷孟元史地理志懷慶路元

初爲懷州太宗四年行懷孟州事丁酉秋見淨文

於山陽當在懷孟時攷漢書地理志河內郡山陽

自東縣太行山在西北又金史地理志興定四年以修

武縣重泉村爲山陽縣隸輝州蓋因漢舊縣而置

元省故城在今懷慶府修武縣魏村漢獻帝爲山

陽公居濁鹿城者卽此故先生別覃懷幕府諸君

詩云太行醴秀在山陽又過濁鹿城與趙尙賓談

山陽舊事詩云因君憶得曹瞞事銅雀臺荒又幾年是先生所稱山陽皆指懷州漢志又有山陽郡治昌邑縣故城在今濟甯州金鄉縣非此山陽也

十年戊戌四十九歲

自東平返冠氏秋始挈家由懷孟歸秀容

先生范鍊師真贊戊戌之夏予過東平留宿正一宮

又千戶趙侯神道碑銘侯諱天錫世爲冠氏人予往

客陽平者六年歲戊戌以叔父之命將就養於太原

侯留連鄭重數月不能別軍行河平予與之偕分道

新鄉置酒行營中夜參半把燭相視不覺流涕之覆

面也明日使人留語云欲與吾子別而情所不忍唯
有毋相忘而已於是疾馳而去不返顧嗚呼此意其
可忘哉

廷堪案先生自癸巳五月北渡至是凡六年始克
歸里故集中有戊戌秋八月初二日別冠氏諸人
詩又有戊戌八月二十二日入濟源寓舍詩戊戌
十月山陽雨夜詩皆自冠氏還鄉道中作也攷別
冠氏諸人詩云分手共傷千里別低眉常愧六年
貧他時細數平原客看到還鄉第幾人云六年貧
與趙侯神道碑客陽平六年者合蓋自癸巳統計

也云平原者卽指天錫蓋先生得歸天錫之力爲多故詩及之又初挈家還讀書山雜詩四首亦作於是年其詩云并州一別三千里滄海橫流二十一年先生自貞祐四年丙子避兵南渡河至此凡二十三年云二十年者舉大數也

又案讀書山卽繫舟山先生本生父東巖公讀書處也趙閑閑滏水集題東巖道人讀書堂詩序云裕之先大夫讀書於此東巖其自號也山頭佛屋五三閒山勢相連石嶺關名字不妨從我改更稱元子讀書山先生詩云天門筆勢到閑閑相國文

章玉筍班從此晉陽方志上繫舟山是讀書山自
注繫舟山先大夫讀書之所閑閑公改爲元子讀
書山

又案別冠氏諸人詩諸本皆戊戌顧俠君元詩選
作戊辰者誤

十一年己亥五十歲

先生以金之寶錄在順天萬戶張柔家乃言於柔願爲
撰述柔奏上方闕館爲樂夔所阻乃構野史亭於家著
述其上當是時渾源劉祁因撰崔立功德碑爲清議所
持乃力以碑文誣先生及王若虛與之共撰以分其過

樂夔楊宏道曹居一輩皆附和其說先生弗之辨也唯
於秋夜詩及外家別業上梁文二篇微示其意而已後
陵川郝經作辨磨甘露碑詩始爲之力白其誣

金史本傳晚年尤以著作自任以金源氏有天下典
章法度幾及漢唐國史作已所當任時金國實錄
在順天張萬戶家乃言於張願爲撰述旣而爲樂夔
所阻而止好問曰不可令一代之蹟泯而不傳乃構
亭於家著述其上因名曰野史凡金源君臣遺言往
行采摭所聞有所得輒以寸紙細字爲記錄至百餘
萬言今所傳者有中州集及壬辰雜編若干卷纂修

金史多本其所著云

又完顏奴申傳贊劉京叔歸潛志與元裕之壬辰雜編二書雖微有異同而金末喪亂之事猶有足徵者焉

郝經先生墓銘國史實錄在順天道萬戶張公府乃言於張公使之聞奏願爲撰述奏可方闢館爲武安樂夔所阻而止

先生秋夜詩九死餘生氣息存蕭條門巷似荒邨春雷謾說驚坏戶皎日何曾入覆盆濟水有情添別淚吳雲無夢寄歸魂百年世事兼身事樽酒何人與細

論

又外家別業上梁文遺山道人蟬蠹書癡雞蟲祿薄
猥以勃窣槃跚之迹仕於危急存亡之秋左曹之斗
食未遷東道之戈船已御久矣公私之俱罄困於春
夏之長圍窮甚析骸死唯束手人望荆兄之通好義
均紀季之附庸出涕而女於吳莫追於既往下車而
封之祀有覲於方來謀則僉同議當孰抗爰自上書
宰相所謂試微軀於萬仞不測之淵至於喋血京師
亦常保百族於羣盜垂涎之口皇天后土實聞存趙
之謀枯木死灰無復哭秦之淚初一軍搆亂羣小歸

功劫太學之名流文鄭人之逆節命由威制佞豈願
爲就磨甘露御書之碑細刻錦溪書叟之筆蜀家降
款具存李昊之世修趙王禪文何預陸機之手迹伊
誰受賞於我嫁名悼同聲同氣之間有無罪無辜之
謗耿孤懷之自信聽眾口之合攻果吮癰舐痔之自
甘雖竄海投山其何恨惟彼證龜而作鼈始於養虺
以成蛇追韓之騎甫還射羿之弓隨毅以流言之自
止知神理之可憑復齒平民僅延殘喘

又外家別業上梁文自注予北渡之初獻書中令君
請以一寺觀所費養天下名士造謗者二三亦書中

枚舉之類也

郝經辨磨甘露碑詩國賊反城自爲功萬段不足仍
推崇勒文頌德召學士潯南先生付一死林希更不
顧名節兄爲起草弟親刻省前便磨甘露碑書丹卽
用宰相血百年涵養一塗地父老來看闍流涕數罇
黃封幾斛米賣卻家聲都不計盜據中國責金源吠
堯極口無醜顏作詩爲雷曹聽翁且莫獨罪元遺山
廷堪案本集己亥元日詩五十未全老衰容新又
新漸稀頭上髮別換鏡中人野史纔張本山堂未
買鄰不成騎瘦馬還更入紅塵故以構野史亭繫

之此年又集中有己亥十一月十三日雪晴夜半
讀書山東龕看月詩又倪莊中秋詩自注己亥
又案元史張柔傳柔字德剛易州定興人金中都
留守戊寅降太祖還其舊職乙酉授行軍千戶保
州等處都元帥崔立以汴州降柔於金帛一無所
取獨入史館取金寶錄并秘府圖書訪求耆德衛
送北歸太宗賜金虎符升軍民萬戶辛丑升保州
爲順天府中統二年以金寶錄獻諸朝致仕又地
理志保定路金順天軍元太宗十一年升順天路
置總管府至元十二年改保定路攷是年己亥卽

太宗十一年與柔傳辛丑升保州爲順天府者差
二年

又案金詩紀事云秋夜詩爲汴京之難言之也金
史文藝傳云天興二年崔立之變羣小附和請爲
立建功德碑翟奕召翰林學士王若虛爲文若虛
自分必死以理論之奕輩不能奪乃召太學生劉
祁麻革輩赴省元好問張信之喻以立碑事祁等
因辭而別數日迫促不已祁卽爲草定以付好問
好問意未愜乃自爲之旣成以示若虛乃共刪定
數字則當時碑文皆以爲裕之所作其不免於物

議可知詩中悲銜坯戶冤抱覆盆傷九死之餘生
慨百年之身世曹聽耳食實繁有徒樽酒細論所
以嘆息於告語之無人也考所引金史出王若虛
傳文前皆本先生內翰王公墓表後數語卽本歸
潛志此作史者不能決擇牽連采入何可引以爲
據且郝陵川詩所謂曹聽翁者卽先生上耶律中
令書中燕人曹居一歸潛志中曹通甫也鮮于樞
困學齋雜錄曹居一字通甫一字聽翁通甫爲及
甫之弟見先生集中所云造謗二三當卽其一今
乃云曹聽耳食實繁有徒竟以曹聽二字作曹好

曹惡解認爲泛指時人其疏若此宜乎論先生此事不能得其要領也

又案金詩紀事云外家別業上梁文中云左曹之斗食未遷時裕之尙官左司都事其後梁王監國始遷左右司員外郎也東道之戈船已御時天興元年春元兵已駐鄭州海灘寺進攻汴京也圍城數月外援莫至奴申乞和訛可出質請罷攻而不得議親捍而大奔車駕蒙塵輿情無主眾欲推立荆王守純以城降元如春秋紀季入齊之義所謂人望荆兄之通好義均紀季之附庸也其時裕之

實請於奴申與阿不欲立監國以全兩宮與皇族
翼日而乃有崔立之變二相被殺故有上書宰相
喋血京師存趙有謀哭秦無淚之歎也至云劫太
學之名流文鄭人之逆節似乎當時碑文仍出劉
京叔手苟如史所云好問意未愜乃自爲之則安
得復云蜀家降款具存李昊之世修趙王禪文何
預陸機之手迹耶此論頗爲得之特所見歸潛志
僅前八卷未覩足本故不能斷定耳其實碑文爲
劉京叔筆詳見歸潛志第十二卷已錄於上卷天
興二年癸巳并附辨於其後蓋文中伊誰受賞卽

歸潛志告身三通特賜進士出身及陵川詩數罇
黃封幾斛米之事也於我嫁名卽歸潛志裕之落
筆草其事金史好問意未愜乃自爲之說也夫
當時立碑撰文不過畏崔立之禍非必取文辭之
工有京叔屬草已足塞立之請何取更爲之耶比
而觀之論者亦可以了然矣又天興二年正月哀
宗戰於衛州敗績夜登舟東幸歸德故曰東道之
戈船已御今謂指元兵駐鄭州亦誤鄭州在汴西
非東也

又案金詩紀事云外家別業上梁文注中所云中

令君蓋耶律楚材也楚材爲文獻公履之第三子
仕元爲中書令裕之獻書卽在癸巳歲之四月於
金爲天興二年於元爲太宗之五年時汴京變後
南中大夫士歸河朔者所在有之故裕之寓書楚
材請以一寺觀費養天下名士也書中所枚舉者
自耆舊如馮內翰叔獻梁都運斗南高戶部唐卿
王延州從之外時輩爲平陽王狀元綱東明王狀
元鶚濱人王賁臨淄人李浩秦人張徽楊煥然李
庭訓河中李獻卿武安樂夔固安李天翼沛縣劉
汝翼齊人謝良弼鄭人呂大鵬山西魏璠澤人李

恆簡李禹翼燕人張聖俞太原張緯李謙冀致君
張耀卿高鳴孟津李蔚真定李治相人胡德珪易
州敬鉉雲中李微中山楊果東平李彥西華徐世
隆濟陽張輔之燕人曹居一王鑄渾源劉祁及其
弟郁李全平定賈庭揚楊恕濟南杜仁傑洛水張
仲經虞鄉麻革東明商挺漁陽趙著平陽趙維道
汝南楊鴻河中張肅河朔勾龍瀛東勝程忌温及
其從弟思忠共四十九人內劉麻二人之名皆在
焉然則所云造謗二三得毋卽指之耶但裕之與
信之素厚內鄉隱居河汾投老始終未嘗有閒京

叔父子兄弟其始亦極爲裕之所推許卽晚歲輯
中州集時論雲卿蓬門先生集中詩尙云二子祁
郁俱有名於時未聞有所譏貶如文中養虺成蛇
彀弓射羿何甚也然猶稱之曰名流不深斥其人
也諉之曰劫明其非得已也復爲之解曰命由威
制則又似乎京叔之撰文翟奕張信之輩實使裕
之促之者復爲之解曰佞豈願爲又似乎京叔屬
草旣定之後裕之亦嘗略爲刪改者後乃盡舉其
過歸之一人是以悼同聲同氣之間有無罪無辜
之謗也攷先生修史爲樂夔所阻劉京叔又引曹

通甫詩爲先生撰碑之證此三人皆書中所枚舉者非卽造謗二三之明驗乎若以與京叔兄弟始終無閒及中州集中論次劉雲卿詩無所譏貶爲疑則所見尤淺夫先生著作關乎國史豈肯以一己之恩怨紊千古之是非且集中尙有贈荅樂丈舜咨及送曹及甫兼及通甫詩而楊叔能亦歸潛志中引其所作之詞爲證者先生則并爲序其所著小亭集是先生於數人皆無所介意不獨京叔兄弟也蓋先生所以不死者爲國史之故非爲富貴聲譽國史不亾其志已遂遑恤悠悠之口哉然

其存心忠厚亦於此可見至於文中命由威制佞
豈願爲二句在劫太學之名流文鄭人之逆節句
之下乃原諒京叔之辭與歸潛志爲二親計劇秦
美新等語正同文義甚明顯而以爲先生自解其
促京叔及刪改京叔之文之語何其慎也益不足
深辨已

又案金詩紀事云遺山集內翰王公墓表云天興
初冬十二月車駕東狩明年春正月京城西面元
帥崔立劫殺宰相送款行營羣小獻諂請爲立建
功德碑以都堂命召公爲文喋血之際翟奕輩侍

勢作威頤指如意人或少忤則橫遭讒構立見屠
滅公自分必死私謂好問言今召我作碑不從則
死作之則名節埽地貽笑將來不若死之爲愈也
雖然我姑以理論之乃謂奕輩言丞相功德碑當
指何事爲言奕輩怒曰丞相以京城降城中人百
萬皆有生路非功德乎公又言學士代王言功德
碑謂之代王言可乎且丞相旣以城降則朝官皆
出丞相之門自古豈有門下人爲主帥頌功德而
爲後人所信者問荅之次辭情閒暇奕輩不能奪
竟脅太學生託以京城父老意而爲之則碑文之

出於劉京叔手可知伯常詩中勒文頌德召學士
潯南先生付一死謂王從之能顧名節也林希更
不顧名節兄爲起草弟親刻豈於時京叔撰文其
弟文季亦在圍城中便爲之上石耶書丹卽用宰
相血傷奴申阿不之見殺也父老來看闔流涕明
非京城父老意也數罇黃封幾斛米卽遺山上梁
文中所云受賞也賣卻家聲都不計當以二劉之
高祖南山翁擔從曾祖西巖老人汲父御史從益
於金源氏百年以來世爲高門今乃以此墮其家
聲爲可惜也但林希二字殊不可解或以麻字之

減文爲林信之自號貽溪復以貽溪之反語爲希
耶信之爲秉彝之孫亦有家聲但與詩所云兄弟
者不合或卽爲信之語以起草讓京叔而以刻石
自任耶末云作詩爲告曹聽翁且莫獨罪元遺山
則所以爲裕之訟冤者雖切然亦未嘗謂不與其
事者蓋裕之自尙書省掾遷左右司員外郎實爲
崔立所署其受謫亦未爲無因也攷伯常詩中林
希更不顧名節句係用宋林希名節埽地語事見
宋史林希傳以喻京叔並無深文乃穿鑿附會以
麻信之當之誤矣又謂先生左右司員外郎爲崔

立所署受謫不爲無因則尤誤金史稱凡除拜皆以監國爲辭安得謂崔立所署必若所云則陶潛之建威參軍不得爲晉處士管甯之太中大夫不得爲漢逸民也且伯常此詩原爲白先生之冤而作故首冠以辨字幾於大聲疾呼今乃曲爲之解謂有微辭則不獨誣先生並誣伯常矣烏可哉再伯常詩兄爲起草弟親刻句亦與歸潛志異志云工書人張君庸

又案本集雜著詩九首中云六國孱王走下風神人鞭血海波紅無端一片云亭石殺盡蒼生有底

功亦借秦事而譏崔立碑也

十二年庚子五十一歲

家居秀容四月嚴實卒往東平

廷堪案本集有庚子三月十日作五言律詩一首

又杏花七言律詩二首自注云庚子歲南庵賦蓋

皆家居作也

十三年辛丑五十二歲

客東平行臺嚴忠濟所

先生故帥閻侯墓表辛丑元日予方客東平載之盛

爲具召余及大興張聖與祁人宋文卿東光句龍英

孺鎮人劉子新太原崔君卿渾源劉文季壽春田仲
德輩飲於家之養素齋

廷堪案是年十一月太宗殂於和林行殿亦爲宋
理宗淳祐元年

又案先生東平行臺嚴公神道碑云以庚子四月
己亥薨於私第之正寢又云五月壬申葬於鵲里
之新塋又云旣葬之三月孤子忠濟等以神道碑
爲請則先生往東平當在去歲庚子嚴實薨後故
閻侯墓表云辛丑元日予方客東平也又元史嚴
忠濟傳忠濟一名忠翰字紫芝實第二子辛丑太

宗命佩虎符襲東平路行軍萬戶中統二年召還
京師命忠範代之幕僚如宋子貞劉肅李昶徐世
隆俱爲名臣是後先生往來東平皆主嚴忠濟家
又案載之卽閭侯也名珍上黨人張聖與郭氏全
金詩云見續夷堅志爵里無攷今據此則聖與當
爲大興人又雲巖詩序稱聖與三世相家以文章
名海內蓋遼金之世族也

壬寅年五十三歲

家居秀容

廷堪案是年春太宗昭慈皇后稱制攝國者五年

元史本紀不紀年但書干支今從之

又案本集晨起詩題下自注壬寅正月九日詩云
鐙火青熒語夜闌柴荆寂寞掩春寒歡悰已向杯
中減老態何堪鏡裏看多病所需唯藥物一錢不
直是儒冠掣鯨莫倚平生手只有東溪把釣竿自
注時欲經營神山別業是知先生是年蓋家居也

癸卯年五十四歲

客燕京冬還秀容復往燕京

先生朝列大夫同知河閒府事張公墓表歲癸卯秋
九月某客燕中

又通玄大師李君墓碑癸卯冬予自燕都還太原道
出范陽

又曹徵君墓表壬辰之兵君流寓宏州癸卯冬予自
新興將之燕中乃枉道過之

又太古堂銘癸卯冬過慶源

續夷堅志癸卯初有熊數十萬從內鄉硤石入西南
山州縣有移文傳報予於彰德見之

廷堪案先生北渡後是年始往燕京元史地理志

大都路元太祖十年克燕初爲燕京路太宗紀八

年夏六月耶律楚材請立編修所於燕京經籍所

於平陽編集經史召儒士梁至充長官以王萬慶
趙著副之編修所者史也先生燕中之行蓋爲史
事又集中有贈荅趙仁甫詩元史儒學傳趙復字
仁甫德安人太宗伐宋挂俘籍姚樞脫之以歸復
至燕學子從者百餘人元好問文名擅一時其歸
也復贈之言以博溺心末喪本爲戒攷先生至燕
在是年則贈復詩亦當作於是年詩云江國辭客
多玉骨無泥塵軒昂見野鶴過眼無雞羣又云老
來詩筆不復神因君兩詩發興新都門回首一大
笑袖中知有江南春其稱之不過如此則知復所

言者先生亦未必以爲然也

又案元史地理志涿州范陽縣倚郭又大同路宏州唐爲清塞軍遼置宏州金仍舊領襄陰順聖二縣皆先生自燕往返及枉道所經者又元史地理志趙州宋爲慶源軍自秀容往燕不經其地意先生是年或偶留真定歟又元史地理志忻州唐初置新興郡後改忻州秀容縣倚郭至元二年省入忻州故先生稱秀容爲新興非後漢建安所置之新興郡也

又案本集有癸卯歲杏花詩云讀書山前二月尾

向陽杏花全未開又病中詩自注癸卯四月二十
一日晨起書蓋皆家居作又有癸卯宿中霍道院
詩又水簾記異詩自注癸卯九月四日同杜仲梁
賦礪谷聖鐙詩自注九月五日作攷水簾諸勝皆
在黃華山然則先生是年秋亦嘗至彰德矣

甲辰年五十五歲

夏五月至崞縣偕定襄李之和廣甯王純甫游鳳皇山
及前山秋往河南

先生兩山行記甲辰夏五月八日予以事當至崞縣
約定襄李之和偕往明日入縣李別去予獨游神清

觀行臺員外廣甯王純甫棄官學道聞予來欣然出
迎純甫先隱前高予問前高比雁門鳳皇山爲何如
純甫言到則知之已而之和至卽日並山而東夜宿
鳳山之麓又明日爲前高之游

又廣威將軍郭公墓表甲辰冬予過洛西

廷堪案本集有甲辰秋洛陽得黃葵子種之南庵
明年夏六月作花詩又過寂通庵別陳丈詩自注
甲辰秋又甲辰秋留別丹陽詩蓋先生於是年秋
往河南又甲辰三月旦日以後雜詩三首及甲辰
夏五月積雨十餘日不止遣悶二首則家居與往

崞縣作也

又案元史地理志冀甯路崞州本崞縣元太宗十四年升崞州

乙巳年五十六歲

自河南扶母張夫人櫬歸秀容秋往崞縣冬復往東平營葬事

先生與樞判白兄書自乙巳歲往河南舉先夫人旅殯首尾閱十月之久幾落賊手者屢矣狼狽北來復以葬事往東平連三年不甯居

又王無競題名記乙巳秋予與梁辨疑李輔之武伯

佐游崞山

又雲巖詩序觀州倅武伯英崞縣人少日舉進士有
詩名其賦剪燭刀有啼殘瘦玉蘭心吐蹴落春紅燕
尾香之句甚爲時輩所稱家故饒財第宅園亭爲河
東之冠貯書有萬卷樓嘉花珍果悉自他州移植爲
人多伎巧山水雜畫斲琴和墨皆極其工嘗得宣和
湖石一窾窾穿漏殆若神劊鬼鑿炷香其下則煙氣
四起散布槃水上濃澹霏拂有煙江疊嶂之韻伯英
恃寶石以擅奇汾晉閒興定末伯英歿於關中楊戶
部叔玉購石得之王辰圍城中以示予且命作詩危

急存亾之際不暇及也乙巳冬十一月來東平過聖
與張君之新軒而此石在焉聖與名之曰雲巖予問
石所從來聖與言夏津王帥得之汴梁泥塗中以見
貽

廷堪案本集有乙巳九月二十八日作詩

又案張夫人歿在正大六年己丑至是年乙巳凡
十七年所云旅殯蓋在內鄉也

定宗元年丙午五十七歲

自東平歸過彰德

先生朝散大夫同知東平府事胡公神道碑歲丙午

某過彰德

廷堪案本集有丙午九日詠菊詩二首亦家居秀容時作也

二年丁未五十八歲

家居秀容

先生藏雲先生袁君墓表丁未春芮城李邦彥過吾州

又朝元觀記丁未春二月梁鍊師辨疑過新興踵門爲予言

廷堪案本集有丁未寒食歸自三泉詩

三年戊申五十九歲

廷堪案是年三月定宗殂欽淑皇后聽政者六月
議所立三歲未決元史不紀年但書干支今從之

己酉年六十歲

客真定總府經歷張德輝所中州集成龍山趙國寶爲
錢木張德輝爲作後序九月往燕京

先生令旨重修真定廟學記王以丁未之五月召真
定總府參佐張德輝北上王從容問及鎮府廟學廢
興德輝奉命而南以己酉春二月庀徒葺事八月落
成釋菜教官李謙暨諸生合辭屬好問爲記以謹歲

月

又信武曹君阡表己酉秋九月予以事來燕都

張德輝中州集後序遺山北渡後網羅遺逸首以纂
集爲事歷二十寒暑僅成卷帙己酉秋得真定提舉
龍山趙國寶資藉之始鋟木以傳

廷堪案元史張德輝傳德輝字輝卿冀甯交城人
金亾北渡史天澤開府真定辟爲經歷官世祖在
潛邸訪中國人材德輝舉魏璠元裕李冶等二十
餘人王子德輝與元裕北覲請世祖爲儒教大宗
師世祖悅而受之因啟綏朝有旨蠲儒戶兵賦乞

令有司遵行從之仍命德輝提調真定學校德輝
天資剛直博學有經濟與元裕李冶游封龍山時
人號爲龍山三老攷先生北渡後往來真定者凡
數年其卒也亦在真定蓋皆客德輝所真定廟學
記所謂王者卽世祖在潛邸時也

又案本集楊叔能小亨集序亦作於是年八月叔
能名宏道淄川人金亾仕元諡文節卽歸潛志引
其詞以證崔立碑者金史元史皆無傳今小亨集
始從永樂大典錄出故王文簡居易錄不能詳其
生平本末也

又案金史本傳云有中州集壬辰雜編若干卷纂
修金史多本其所著又歐陽元圭齋集送振先宗
文歸祖庭詩小序云近年奉詔修三史於翰林故
府中攜金人遺書得元遺山裕之手寫壬辰雜編
一帙然則金史之成多本於先生二書可知中州
集成於是年壬辰雜編已佚不知成於何時竊謂
先生以史自任故天興顛沛之際猶請以小字書
國史一本隨駕蓋綜金源一代而論收國之平遼
天輔之滅宋征伐之功不可泯也天眷之守成正
隆之好大治亂之迹不可沒也大定之深仁厚澤

比於堯舜明昌之典章制度幾及漢唐尤先生所
惓惓不忘者也至於貞祐遷汴以來學士大夫風
雅相尚山林韋布文章自雄矧夫戈船東狩旃車
北渡國君徇社稷烈士死封疆疾風勁草觸處生
悲皆先生目覩而身罹者國可亾史不可亾身可
死史不可死所以奔走閒關終身不受升斗之祿
不過欲以此身存百年之掌故而已向使奉詔闢
館之日羣小不阻則網羅散佚搜采舊聞其所成
之書當必明備詳覈鬱爲大觀豈歐陽元輩所可
及哉然金源一代文獻卒賴野史亭紀載之力令

後人猶有可攷雖謂先生纂述之功與完顏彝之
死綏張天綱之不屈爭烈可也再攷先生構野史
亭在己亥歲至是年僅十一年北渡在癸巳歲至
是年亦僅十七年張德輝後序言歷二十寒暑蓋
約計之也

又案本集有己酉四月十七日度石嶺詩石嶺關
在忻州卽元至正間察罕與孛羅分據以爲界者
也

庚戌年六十一歲

往順天路萬戶張柔家觀金寶錄

先生順天府營建記庚戌秋七月予過順天

廷堪案本集與樞判白兄書云惟有實錄一件只
消親去順天府一遭破三數月功披節每朝終始
及大政事大善惡係廢興存亾者爲一書大安及
正大事則略補之此書成雖溘死道邊無恨矣更
看向去時事稍得放鬆否也則知先生是年順天
之行爲觀金之實錄也

又案齊履謙知太史院事郭公行狀公諱守敬字
若思順德邢臺人先是順德城北有石橋以通達
活泉水兵後橋爲泥潦淤沒失其所在公甫冠爲

遺山先生年譜卷下
三
之審視地形按指其處而得之河東元公裕之文
其事於石其曰里人郭生者卽公是也又先生邢
州新石橋記兩安撫張君耘夫劉君才卿思欲爲
經久計乃命里人郭生立準計工攷郭守敬卒於
元仁宗延祐三年丙辰年八十六則其甫冠當在
是年庚戌先生年六十一守敬水利律數及儀象
制度之學皆前世所未有論者推爲一代異人而
少時蒙先生一語之稱道作行狀者且據之以爲
榮則先生在當時聲望固何如也

憲宗元年辛亥六十一歲

家居秀容秋往真定

先生真定府學教授常君墓銘歲辛亥九月晦自太

原東來過仲明之門

廷堪案仲明卽常君也名用晦崞縣人又本集有

辛亥寒食詩蓋家居秀容作

又案續夷堅志辛亥秋予與毛正卿德義仲昆郝

伯常劉敬之諸人游順天寶教院則是年先生亦

至順天也

二年壬子六十三歲

在真定與張德輝北見元世祖於潛邸返真定後冬往

東平

元史張德輝傳王子德輝與元裕北覲請世祖爲儒教大宗師世祖悅而受之

先生東平行臺嚴公祠堂碑銘王子孟冬公之嗣子某走書幣及好問於鎮陽

又東平賈氏千秋錄後記壬子冬十月自真定來東

原

又贈蕭漢傑詩序蕭漢傑大興人金初嘗賜姓奧里

氏故時人又謂之奧里漢傑從軍二十年積官從三

品燕城圍解之後間關南渡鐵嶺之潰復入陝州陝

州亂羣不逞繫漢傑獄中漢傑破械而出爲失侯故
將者又二十年王子冬與予相值於東原問其世知
其爲故人大鈞之同母弟也

廷堪案先生以金源遺老而往見元世祖於潛邸
者亦許魯齋不如是則道不行之義也夫明夷陳
範振鷺來雍古人固已有之魯齋未仕金故拜爵
而不復辭先生已仕金故往見而不受祿出處之
道易地則皆然也

又案蕭漢傑賜姓奧里氏郭氏全金詩云案金國
語解無奧里姓氏諸人事物類亦無此稱攷金史

奚王同離保傳贊曰奚有五大定閒類族著姓有
遙里氏伯德氏奧里氏梅知氏揣氏是金有奧里
氏矣但國語解未載耳

又案本集遊承天鎮懸泉詩自注閑閑公守平定
以大安庚午來遊迄今壬子四十三年矣攷先生
自秀容東來常經過平定每稱平定爲鄉郡金史
地理志平定州有承天鎮卽此詩云十月東來犯
其冰雪豈是年十月又至平定歟顧亭林日知錄云
額金元好問承天鎮懸泉詩注曰平定土俗傳介子
推被焚其妹介山氏恥兄要君積薪自焚號曰妬

女祠其碑大厯中判官李諲撰辭旨殊謬至有百
日積薪一日燒之之語鄉社至今以百五日積薪
而焚之謂之祭妒女其詩有曰神祠水之滸儀衛
盛官府頗怪祠前碑稽攷失莽鹵吾聞允格臺駘
宣汾洮障大澤自是生有自來歸有所假而自經
溝瀆便可尸祝之祀典紛紛何所取子胥鼓浪怒
未洩精衛銜薪心獨苦楚臣百問天不酬肯以誕
幻虛荒驚聾瞽自有宇宙有此水此水縣縣流萬
古人言主者介山氏且道未有介山之前復誰主
山深地古自是有神物不假靈真誰敢侮稗官小

說出閭巷社鼓村簫走翁姥當時大庠十才子爭
遣李譚鑿陋語此是千古正論亭林通儒嘗薄文
人爲不足爲今乃推崇先生之詩如此蓋亭林所
薄者弇陋剽襲之文人而非有根柢之文人也再
攷此詩無錫華氏本失載

又案本集有壬子寒食詩又寒食詩自注壬子清
明後作皆似在家居時送高雄飛序在真定作爲
是年秋七月又壬子月夕詩云遙憐小兒女把酒
望東州又壬子冬至新軒張兄聖與求爲兒子阿
平制名詩聖與家在東平則皆東平時作也

三年癸丑六十四歲

在東平夏以事至燕京冬復往東平

先生致樂堂記癸丑之夏予以事來故都

又王黃華墓碑癸丑夏六月某客燕中

又宣武將軍孫君墓銘癸丑之冬予以行臺之召東
來

廷堪案是年亦爲宋理宗寶祐元年

又案本集送崔夢臣北上詩序云癸丑二月望日

新興元某序詩作於二月先生當在東平又題張

彥寶陵川西溪圖自注癸丑十一月三日題則先

生亦在東平也

四年甲寅六十五歲

正月歸秀容秋游龍泉冬往東平十二月復由真定歸

秀容

先生新軒樂府引甲寅十月望日河東元某題

又廷堪案本集有甲寅正月二十三日故關道中詩

又又臺山雜詠詩自注甲寅六月則知先生正月卽

歸秀容也又甲寅九月同臨漳提領王明之鹿泉

令張奉先賈千戶令春李進之冀衡甫遊龍泉寺

詩獲鹿爲隋鹿泉縣則知先生九月在獲鹿游龍

泉也新軒爲張聖與所居聖與家東平則知先生
十月在東平也又甲寅十二月出鎮陽寄宰魯伯
詩則知先生十二月自東平由真定而歸也又集
中有鹿泉新居二十四韻詩云甯州假館又兩年
未保東來不西去然則先生是年後又嘗僑居獲
鹿也

又案先生自癸巳北渡後戊戌始歸秀容中間或
在冠氏或在東平或在河南或在燕京或在順天
或在真定或在秀容行蹤無常最難攷定非若癸
巳以前有本傳及墓銘可憑蓋卽徐世隆所謂周

流乎齊魯燕趙晉魏之間幾三十年者是也其在
冠氏者主趙天錫家在東平者主嚴實及忠濟家
在河南者爲扶輿事在燕京者爲國史事在順天
者主張柔家在真定者主張德輝家在秀容者則
家居也及其卒也乃在獲鹿則鹿泉新居或亦依
德輝者歟

五年乙卯六十六歲

往東平冬復返真定

先生濮州刺史畢侯神道碑銘乙卯秋八月予來自
鎮陽東平參佐王君璋以畢侯之子來

廷堪案本集有乙卯二月二十一日歸自汴梁二
十五日夜久旱而雨偶記內鄉一詩追錄於此今
三十年矣據此則是年先生當至汴梁又有乙卯
十一月往鎮州詩蓋自東平返真定也又有乙卯
端四日感懷詩

又案元史閻復傳弱冠入東平學時嚴實領東平
行臺招諸生肄進士業迎元好問校試其文預選
者四人復爲首攷復卒於皇慶元年壬子年七十
七則冠時當在是年乙卯時嚴實已前卒十三年
迎先生往東平校士者當屬嚴忠濟云嚴實者元

史誤也

六年丙辰六十七歲

在獲鹿

先生故廉訪使楊公神道碑丙辰冬十月予聞居西山鹿泉

廷堪案本集有丙辰九月二十六日挈家游龍泉詩云明年此日知何處莫惜題詩記姓名先生竟以次年九月四日卒蓋詩識也

七年丁巳六十八歲

七月將西歸不果遂於九月四日卒於眞定獲鹿寓舍

歸葬於秀容陵川郝經銘其墓

先生尙藥吳辨夫壽家記丁巳秋七月予將西歸尙藥吳辨夫有詩

金史本傳所著文章詩若干卷杜詩學一卷東坡詩雅三卷錦機一卷詩文自警十卷今所傳者有中州集及壬辰雜編若干卷年六十八卒

郝經先生墓銘歲丁巳秋九月四日遺山先生卒於獲鹿寓舍經走常山三百里爇文酌酒哭於畫像之前

又某年月日葬於秀容之先塋

又當德陵之末獨以詩鳴上薄風雅中規李杜粹然
出於正直配蘇黃氏天才清贍邃婉高古沈鬱太和
力出意外巧縟而不見斧鑿新麗而絕去浮靡造微
而神采燦發雜弄金碧揉飾丹素奇芬異秀洞蕩心
魄看花把酒歌謠跌宕挾幽并之氣高視一世五言
以雅爲正出奇於長句雜言至千五百餘篇爲古樂
府不用古題特出新意以寫怨思者百有餘篇用今
題爲樂府揄揚新聲者又數十百篇皆近古所未見
者也汴梁亾故老皆盡先生遂爲一代宗匠以文章
獨步幾三十年銘天下功德者盡趨其門有例有法

有宗有趣又至百餘首爲杜詩學東坡詩雅錦機詩
文自警等集指授學者方吾道壞爛文曜瞠昧先生
獨能振而鼓之揭光於天俾學者歸仰識詩文之正
而傳其命脈繫而不絕其有功於世又大也爲中州
集百餘卷又爲金源君臣言行錄往來四方采摭遺
逸有所得輒以寸紙細字親爲紀錄雖甚醉不忘於
是雜錄近世事至百餘萬言摺束委積塞屋數楹名
之曰野史亭書未就而卒嗚呼先生可謂忠矣

李冶先生文集序興定正大中殆與楊趙齊驅壬辰
北還老手渾成又脫去前日畦畛矣

徐世隆先生文集序金百年來得文派之正而主盟
一時者大定明昌則承旨党公貞祐正大則禮部趙
公北渡則遺山先生一人而已

四庫書提要遺山集四十卷附錄一卷金元好問撰
好問字裕之秀容人登興定五年進士歷內鄉令天
興中除左司都事轉行尙書省左司員外郎金亡不
仕事蹟具金史文藝傳是集凡詩十四卷文二十六
卷爲明儲懽家藏本宏治戊午沁州李翰爲刊板以
行前有李冶徐世隆二序末有王鶚杜仁傑二跋集
末附錄一卷則儲懽所裒輯也好問才雄學贍金元

之際屹然爲文章大宗所撰中州集意在以詩存史
去取尙不盡精至所自作則興象深邃風格道上無
宋南渡末江湖諸人之習亦無江西流派生拗粗獷
之失至古文繩尺嚴密眾體悉備而碑版誌銘諸作
尤爲具有法度晚年嘗以史筆自任構野史亭採金
源君臣遺言往行哀輯紀錄至百餘萬言今壬辰雜
編諸書雖已無傳而元人纂修金史多本其所著故
於三史中獨稱完善亦可知其著述之有裨實用矣
顧嗣立元詩選小序百年以還名家輩出別裁僞體
溯流窮源論者以先生爲標準不亦宜乎

廷堪案後三年庚申世祖卽位始建元日中統迨
至元八年辛未始改國號曰元

又案本集有張村杏花詩自注丁巳三月初二日
又病中感寓贈徐威卿兼簡曹益甫高聖舉詩蓋
先生絕筆也

又案倪魯玉補遼金元藝文志載先生所著書目
史部雜史類有壬辰雜編子部小說家有續夷堅
志集部別集類有遺山集四十卷附錄一卷遺山

詩集二十卷詞曲類有中州樂府一卷遺山樂府

二卷

穆案遺山樂府五卷阮太傅於嘉慶中采進
入內有提要載擘經室集而其原本則文

選樓書目亦不載也聞漢陽葉氏有寫本
屢求未獲姑記於此待它日購得補刻云
總集類
有唐詩鼓吹十卷注云元中書右丞郝天挺注中
州集十卷文史類有杜詩學一卷東坡詩雅三卷
錦機一卷詩文自警一卷較本傳所載多續夷堅
志遺山樂府中州樂府唐詩鼓吹四種壬辰雜編
續夷堅志不載卷數今新刻續夷堅志二卷有至
順二年石民瞻跋中州集十卷與今所行本同陵
川墓銘作百餘卷恐誤詩文自警一卷與本傳作
十卷者亦異詩集二十卷者卽汲古閣毛氏所刊
本也今四庫著錄者惟遺山集四十卷附錄一卷

中州集十卷中州樂府一卷唐詩鼓吹十卷元潘
蒼厓金石例所取之文韓柳與先生爲多并云韓
魏公祭式元遺山記其大略姑錄之此必在先生
所著書之內今不可攷矣壬辰雜編倪氏不載卷
數是亦未見興化任幼植禮部嘗爲予言昔校歸
潛志以爲壬辰雜編已佚後聞江南藏書家尙有
之偃師武虛谷進士亦云朱笥河學士有此書戊
申冬詢之朱少白同年云幼時見家有藏本虛谷
所言不妄亦不知其確否也附記於此以俟博雅

者

穆案據四元玉鑑莫若敘
則先生亦明算有細艸

又案徐威卿先生集序云東平嚴侯弟忠傑喜與
士人遊雅敬遺山求其完集以大其傳又李仁卿
序云東平嚴侯弟忠傑有文如淇澳好善如干旄
獨能求其全編將鋟之梓且西走書數百里命予
序引攷忠傑爲嚴實之子忠濟之弟見元史嚴實
傳刻先生遺集在中統三年距先生之歿方六稔
蓋先生北渡後設館授餐買山投老俾得肆力於
編纂身後并爲刊布遺書雖趙天錫張德輝等分
任之而嚴氏父子兄弟實始終其事云

元遺山先生年譜卷下終